

**Ilinniarnertuunngorniartarneq pillugu Inatsisartut
inatsisaata allanngortinnera pillugu Inatsisartut
inatsisaat
(Ilinniartussanik tiguisarneq pillugu suleriaatsimik
allannguneq, semesterimut siullermut
tunngaviusumik ingerlatsinermik allannguneq,
ilinniartitsisunut siunnersuisoqatigiit pillugit
malittarisassat nutaat il.il.)**

§ 1

Ilinniarnertuunngorniartarneq pillugu Inatsisartut inatsisaanni nr. 13, 22. november 2011-meersumi, Inatsisartut inatsisaat nr. 31, 9. december 2015-imeersoq aqqutigalugu allanngortinneqartumi, uku allanngortinneqarput:

1. § 1, imm. 1-imi, oqaaseqatigiit aappaat atorunnaarsippaa.

2. § 5, imm. 1, ima oqaasertaqarpoq:

" Naalakkersuisut ilinniarnertuunngorniarnermut ilinniartunullu inissiaqarnikkut inissat ima amerlatigisut qularnaassavaat, qinnuteqartut § 8, imm. 1 aamma 2 naapertorlugit ilinniartunngornissamut piumasaqaatinik eqquutsitsisut tamarmik ilinniartunngorsinnaatillugillu ilinniakkaminnik naammassinnissinnaatillugit. Aammattaaq Naalakkersuisut anguniassavaat ilinniarnertuunngorniarniit ilinniartunullu inissiat ima amerlatiginissaat, qinnuteqartut ilinniartunngorniarni misilitsinnermi angusisut tamarmik, tak. § 9, imm. 1, aamma qinnuteqartut immikkut akuerisaallutik ilinniartunngortinneqarumasut, ilinniartunngortinneqarsinnaallutik ilinniarnertuunngorniarnilulu ilinniagaq naammassisinnaallugu."

3. § 8, imm. 1, nr. 3, imatut oqaasertalerneqarpoq:

"3) Greenlandic Grading System-skala naapertorlugu 10. klassimi inaarutaasumik angusimasanut karakterini tamani minnerpaamik karakteri E anguneqarsimappat."

4. § 8, imm. 2, imatut oqaasertalerneqarpoq:

" Imm. 2. Rektori imm. 1-imi piumasaqaatinik sanioqqutitsinissamut akuersisinnaavoq, qinnuteqartup

misilitsinnerit imaluunniit killiffimmi karakterit ikittunnguit ilaanni E ataassimappagu, rektorillu nalilerpagu qinnuteqartup ataatsimut piginnaasai ilinniarnertuunngorniarluni ilinniakkap naammassinissaanut naammattut."

5. § 9 imatut oqaasertalerneqarpoq:

" § 9. Qinnuteqartut § 8, imm. 1 imaluunniit 2 naapertorlugu ilinniartussatut tiguneqanngitsut Naalakkersuisunit neqeroorfigineqassapput nalilersorneqarlutik tigusaanissamut misilitsillutik. Misilitsinnerup siunertaraa, qinnuteqartup ilinniartitsinermik malinnaanissamut ilinniakkallu naammassinissaanut naammattumik ilinniakkatigut ilisimasaqassutsimik takutitsinissaminut periarfissinnissaa.

Imm. 2. Inissaq pissutigalugu qinnuteqartut ilinniartunngorniarluni misilitsinnermi angusisut inissaqartinnginneri peqqutigalugit tiguneqarsinnaanngippata, rektorip aalajangissavaa qinnuteqartut kikkut ilinniartunngortinneqassanersut. Rektorip taamatut aalangiinnermini qinnuteqartup ilinniarnertuunngorniarnarluni ilinniakkamik naammassinninnissamut periarfissai ataatsimoortumik nalilersussavai. Qinnuteqartut ilinniarnertuunngorniarmimi ilinniartunngortinneqanngitsut, inissaqassuseq apeqqutaatillugu ilinniarnertuunngorniarmimi allami ilinnialernissaannik utaqqisunulluunniit allatsinnissaminut neqeroorfigineqassapput."

6. Inatsimmi sumi tamani "tunngaviusumik ingerlatsineq" ima allanngortinneqassaaq: "semesteri siulleg".

7. § 11 imatut oqaasertalerneqarpoq:

" § 11. Qinnuteqartut ilinniarfiit aallartikkusutaminnik kissaatimi tullerriarneri pingaarnerniit normulerlugit allassavaat.

Imm. 2. Qinnuteqartut ilinniarnertuunngorniarmimi kommunimi qinnuteqarnermik nalaani aalajangersimasumik najugaqarfigisaminniittumi (kommuni angerlarsimaffik) ilinniartunngussapput imaluunniit ilinniarnertuunngorniarmimi sammivik kissaatigisaminnik neqeroorutilimmi ilinniartunngortinneqassapput kommunip angerlarsimaffiup neqeroorutaaniinngippat ilinniarnertuunngorniarmimi allami, taamaattoq tak. imm. 3-5.

Imm. 3. Naalakkersuisut aalajangersinnaavaat qinnuteqartoq ilinniarnertuunngorniarmimi imm. 2-mi, pineqartuunngitsumi ilinniarnertuunngorniartutut aallartissinnaasoq, inissaqarnikkut imaluunniit suliamut atatillugu inuttulluunniit pissutsit immikkut ittut tamanna pisariaqartilerpassuk.

Imm. 4. Ilinniarnertuunngorniarmimi aalajangersimasumi ilinniakkatut sammivimmut aalajangersimasumut ilinniarfiup inissaqartitaaniit amerlanerulaartunik qinnuteqartoqarpat, Naalakkersuisut killilimmik amerlanerusunik ilinniartunngortitsisinnaaneq akuersissutigisinnaavaat. Ilinniarnertuunngorniarmimi aalajangersimasumi ilinniakkatut sammivimmut aalajangersimasumut ilinniarfiup inissaqartitaanit amerlaneroqisunik qinnuteqartoqarpat, rektorip qinnuteqartut pisinnaasaannik ilinnialerumallutillu pissutigisaannik ataatsimoortumik nalileereernermigut aalajangissavaa, qinnuteqartut kikkut ilinniartunngortinneqassanersut. Qinnuteqartut ilinniartunngortinneqanngitsut pingaarnerniit tullerriarnerminni tulluutsitartik naapertorlugu ilinniartunngortinneqassapput, malittarisassat maani nalunaarsorneqartut naapertorlugit.

Imm. 5. Naalakkersuisut qinnuteqartut illoqarfinnit, nunaqarfinnit imaluunniit sumiiffinnit aalajangersimasumik killilernerqarsimasuneersut ilinniarnertuunngorniarmimit tiguneqarnissaat

eqqarsaatigalugu kommunimi allami angerlarsimaffeqartutut isigineqarsinnaaneratt pillugit malittarisassanik aalajangersaasinnaapput.”

8. § 15, imm. 1-imi oqaaseqatigiit aappaat atorunnaarpoq.

9. § 16, imm. 2, imatut oqaasertalerneqassaaq:

” Imm. 2. Ukiuni pingasuni ilinniakkap ataatsimut katillugit tiimit 2225-2725-ussapput ilinniartullu ilinniakkaminik sammivimmik immikkullu toqqagassanik toqqaasimanera apeqqutaalluni ukiuni marlunni ilinniarnerni tiimit 1500-1825-ussallutik.”

10. § 16, imm. 4 nutaatut ilanngunneqassaaq:

” Imm. 4. Imm. 2-mi taaneqartunit sivisunermik sivikinnermilluunniit ilinniarfusuni atuartsiviusut tiimit qassiussanersut malittarisassanik Naalakkersuisut aalajangersaasinnaapput.”

11. § 19 atorunnaarsinneqarpoq.

12. § 20, imm. 2, imatut oqaasertalerneqassaaq:

” Imm. 2. Naalakkersuisut semesterimi suullermi pinngitsoorani sorliit atuartsissutigineqartussat pillugit malittarisassanik aalajangersaasinnaapput.”

13. § 23 aamma § 28 atorunnaarsinneqarput.

14. § 65 ima oqaasertaqassapput:

” **§ 65.** Ilinniarnertuunngorniarfinni ataasiakkaani tamani ilinniartitsisut siunnersuisartoqatigiiliussapput, tassani inuttaassallutik rektori, immikkoortortani pisortat kiisalu ilinniartitsisut, ilinniarnertuunngorniarfimmi atuartsisartut imaluunniit atuartsinermut ilinniartitsinermulluunniit arlaatigut attuumassuteqartut. Ilinniartut siunnersuisartoqatigiivisa peqataatitaat ilinniartitsisut siunnersuisartoqatigiivisa ataatsimiinnerini malinnaasutut peqataasinnaavoq.

Imm. 2. Ilinniartitsisut siunnersuisoqatigiit rektorimut siunnersuisassapput.

Imm. 3. Ilinniartitsisunut siunnersuisoqatigiit ukiumut ikinnerpaamik sisamariarlutik ataatsimiittassapput. Ilinniartitsisut siunnersuisartoqatigiivisa namminneq suleriaasissartik aalajangissavaat. Inaarutaasumik suleriaasissaq rektorimit akuersissutigineqassaaq.

Imm. 4. Ilinniartitsisunut siunnersuisartoqatigiit apriilimi ukiut tamaasa siulittaasussaminnik qinersisassapput.

Imm. 5. Ilinniartitsisunut siunnersuisoqatigiinni apeqqutit sorliit qaqineqassanersut rektorip ilinniartitsisunullu siunnersuisoqatigiinni siulittaasorlu ataatsimoorlutik aalajangertassavaat.

Imm. 6. Ilinniartitsisut siunnersuisartoqatigiivini sulineq piffissamut ilinniartitsisup ilinniartitsiffianut ilaasutut naatsorsuunneqarpoq. Sulineq ima aaqqissuuneqassaaq, ilinniartitsisoq sapinngisamik annertunerpaamik ilinniartitsinermik pilersaarusioriikkamik ingerlatsisinnaatillugu.

Imm. 7. Naalakkersuisut ilinniartitsisut siunnersuisartoqatigiivi pillugit malittarisassanik erseqqinnerusunik aalajangersaasinnaapput, tamatumunnga ilanngullugit ilinniartitsisut siunnersuisartoqatigiivinut qinersisarneq, siunnersuisartoqatigiit sulinerat piffissarlu atuuffiat.”

§ 2

Inatsisartut inatsisaat ulloq 1. januar 2021 atortuulissaaq. Aalajangersakkat § 1, nr. 6, 8, 9, 10, 11 aamma 14 atortuulissapput ulloq 1. august 2021.

Namminersorlutik Oqartussat, ulloq 27. november 2020

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut